

Izjava visokog predstavnika o Vladi Federacije BiH

Imajući u vidu da su događanja prošle sedmice u Parlamentu Federacije BiH još jednom potvrdila neuspjeh političkih stranaka da kroz politički dijalog nađu rješenja, visoki predstavnik Inzko je konstatirao da se postojeći politički zastoj može prevazići iskrenim pregovorima i većom fleksibilnošću svih strana, vodeći računa o interesima građana.

„Kada pratite razvoj ovih događaja i rijetko čujete bilo kakvo pozivanje na to što konkretno strane namjeravaju učiniti da bi ispunile obećanja data građanima, teško je izbjegći utisak da su interesi stanovništva u cijelini daleko od toga da budu prioritet kakvim bi trebali biti za bilo koju koaliciju“, rekao je visoki predstavnik Valentin Inzko u svojoj današnjoj izjavi.

Visoki predstavnik je podsjetio sve nadležne vlasti i stranke da, bez obzira na trenutne pokušaje preustroja Vlade Federacije, i dalje imaju obavezu da u cijelosti poštuju vladavinu prava, demokratske institucije te ustavni i pravni poredak.

Visoki predstavnik je podcrtao da stranke koje formiraju većinu u Parlamentu Federacije imaju jasno i legitimno pravo da zahtijevaju formiranje nove vlade na osnovu te većine. Međutim, ukoliko se i dok se taj cilj ne postigne ustavnim procesom, što još uvijek nije slučaj, postojeća Vlada Federacije ima jasnu odgovornost da i dalje funkcionira u punom kapacitetu prema ustavu i zakonima. Osiguranje stalnog punog funkcioniranja Vlade nije samo ustavna i zakonska obaveza već i najveća politička odgovornost u vremenu kada se građani Federacije suočavaju sa ogromnim socijalno-ekonomskim

i drugim izazovima.

Ova događanja su također istaknula i neprihvatljivo odlaganje, koje traje zadnjih nekoliko godina, da se imenuju sudije Ustavnog suda Federacije, što sprečava taj sud da na najefikasniji način odlučuje o slučajevima vitalnog nacionalnog interesa. Sada je od suštinske važnosti da predsjednik FBiH, u suglasnosti sa dva potpredsjednika, a nakon toga i nadležni domovi Parlamenta FBiH, poduzmu korake i popune odavno upražnjena mjesta kako bi ovo tijelo moglo u potpunosti funkcionirati i promptno rješavati pitanja vitalnog nacionalnog interesa.

„Očekuje se od svih političkih aktera, bez izuzetaka, da odmah omoguće imenovanje sudija Ustavnog suda FBiH te da se suzdrže od bilo kakvih opstrukcija njihovog imenovanja“, rekao je visoki predstavnik Inzko. „Snažno bih sugerirao da stranke veoma pažljivo razmisle prije nego što postupcima paraliziraju sistem.“